

ПОУЧЕНИЕ СВЯЩЕННОМУ ЧИНУ И ПРИЧЕТНИКАМ¹

Никон, Божию милостию Патриарх Московский и всея Руси
сыном своим Архимандритом и Игуменом, Протопопом и всем священником и диаконом
и причетником.

Ведомо нам учинилося, что во святых церквах небрежение велико есть и житие зазорно, и о преданных евангелских повелений и апостолских преданий и святых богоносных отец седми Вселенских Соборов и прочих святых отец, еже должно вам хранить, и не сохраняете тоя, яко же божественный Павел уча ны пишет к Титу, глаголя: во еже обучати же ся всегда к благочестию, трезвению, целомудрию, благоговению и будете, рече, честни, страннолюбивы, не пианицы, не бийцы, не мшелоимцы, не сварливы, но кротцы[ки], смотреливы, не завистливы, не сребролюбцы, учителны, яко же Вселенскаго Собора 19-е правило глаголет: иереи должни суть учити причет церковный и вся люди благоверию и божественным повелением; паче же иных дний, во всякую неделю всего причта и народа поучати благочестию словесы, яко же предречеса от Божественнаго писания, избирающем истинная разумения же и судьбы, и не преступати еже положенныя пределы и богоносных отец предания, но точию от Божественных писаний сказывати и учити истинному разумению Божиих заповедей. Аще ж кто вопросит словесе Божественных Писаний, да не своего ума то сказовати, но якоже церковнии святилици и учителяе своих писаний истолковаша; то бо есть благоволно, еже ведети и умети предания богоносных отец, и потом разрешати вопрошаемая, да не како недоумеюще от себе разрешите, восхотят таковии истиннаго сказания далече отпадут. Небрегущих же иереев, ни учащих причетников людей благоверию 58-е апостолское правило первее отлучает; потом, аще в ленности пребывает, от сана измещет. Потщитесь, о презвитери, представити себе делателие непостыдны: правяще слово истинное николи же да не станете в соборе вражду имея на кого, да непростением Утешителя в день собора молвы не творити и не препирайтесь, но в церкви пребывая молитесь и почитайте книги святыя до часа, в онь же подобает вам совершити Божественную службу, и тако предстаните со умилением и чистым сердцем святому жертвеннику не озираяся семо и овамо, но в страсе и трепете

¹ ГИМ. Собр. А.С. Уварова. Ф. 17. Оп. 2. № 54. Л. 1. См.: *Леонид (Кавелин), архимандрит. Систематическое описание рукописей графа А.С. Уварова. М., 1894. Ч. 3. Отд. IV. № 1543 (312) (750). Документ относится к февралю 1654 г. См. редакцию этого текста: Лобачев С.В. Патриарх Никон. СПб., 2003. Приложение 5. С. 372–375.*

предстояще Небесному Царю ничим же мнее небеснаго предстояния; да не угодия ради человеческого подщитесь скратити молитвы, не примите ж лица человека, но взирающе ко единому Царю и предстоящим окрест Его силам достойны себе творити священным правилом, и их же отресоша с теми не служити же; блюдите, Кому предстоите и Кому служите и которым даете причащения, не забывайте Владычных заповедей и святых Его апостол: не дадите бо, рече, святых псом и бисера не мещите пред свиньями; блюдите пес и яж по сих смотрите, да не убойтесь человек, на грех себе не дадите Сына Божия в руки недостойным, не устыдитесь никого же от славных земли в час той, ни самаго того, носящаго венец; причащения же достойным подавайте, якоже и вы сами прияли, есте имже божественная правила не повелевают, не подавайте яко иноязычницы бо вменишася и аще не обратятся, горе и тем и причащающим их; блюдите, аз и о сем дела не имам, вы узрите такожде иже аще кто от вас причащай люди Пречистым и Животворящим Тайнам, и аще бо просит медницы, таковой извержется по 23-му правилу шестаго Вселенскаго собору. Такожде аще который пресвитер, или диакон, или поддиакон, или чтец, или певец в четыредесят дней, сиречь в Великий пост, не постится и во вся лета во всякия среды и пятки, да извержен будет по 69 му правилу святых апостол. Аще же мирский человек не постится, да отлучится, или аще кто преданья посты, хранимая Церковию, разреша, таковой проклят есть по 18 правилу иже в Гангрех Собора; а от престола, к нему же кто благословен есть и у него же кто служити начнет, преходити, никако же власти не имати по 3-му правилу иже во Антиохии, и двема церквама да никто же владеет по 15 правилу седмаго Вселенскаго собора, да не святая корчемствовати от вас явитца, но кийждо единому и тоемужде престолу да предстоит в церкви свободою изобилующей, а в церкви, куплею стяжанней, рекше, не у купленнаго места, ея ж ради извержению предает той же Вселенский Собор по 13-му правилу, или аще кто от вас лихву взяв от должника, да извержется по 44-му правилу святых апостол.

Ведомо ж нам и се, что во святых посты поклоны творят не по церковному преданию, еже есть метание с великими не различают, овии поклонився единою на землю и тако не всклоняся множицею крестится да точию головою кивает, а инии на скамейцы. И о том бы вам самем испытно ведати, что метание и что суть великия поклоны метание суть: в пояс поклонитися как мощи до земли рукою достати, а великий поклон в землю челом ударити. И отныне клали бы есте сами поклоны и прочим повелевали по уставу Святые Восточные Церкви и по благословию нашего смирения вси вкупе равно тихо. Егда полагаются семь на десять поклонов по «Сущую Богородицу» поклон земный и прочих три великия в землю с молитвою «Господи, Владыко животу моему», к сем же два на десять метания в пояс, и последний великий ж поклон в землю. Тако и «Святый Боже» и на «Приидите, поклонимся». Поясныя ж поклоны клали со всяким благочинием немятежно. Аще ли же кто от вас о сем завещании не брещи имать или чесого неподобающаго священства кто от вас начнет деяти еже чрез заповедь святых апостол и богоносных отец и нашего благословения, яже выше рекохом, таковым будет суд без милости от нас по правилом святых апостол и богоносных отец; такоже аще кто и мирский человек прекослов и нерадив явится о преданных заповедех Христовых и святых апостол и святых отец, и вам бы им запрещати по правилом святых апостол и святых отец. А аще кто зело явится прекословен, и вам бы возвещати нам, Великому Государю Святейшему Никону, Патриарху Московскому и всея Руси. А аще ли же таковым сам не запретит и нам не возвестит, таковой о всяцем неисправлении сам ответ даст в день праведнаго суда Христова, еже зде правильным судом от нас истязан немилостиво будет. Сего ради, братие, завещанным внимайте да сохраняюще заповеди Божия и предания святых апостол и святых богоносных отец злобы избывше, с правдою проживем о Христе Иисусе Господе нашем, Ему же слава со безначальным Его Отцем и со Пресвятым и благим и Животворящим Духом ныне и присно и во веки веков. Аминь.